

# Amanat berat untuk Abdul Adzis

» Malam Puisi PENA jadi pentas rai pelantikan sebagai Ketua Pengarah baharu DBP



Oleh Latifah Arifin

latifah@bh.com.my

Sajak Dirgahayu DBP yang disampaikan oleh penyair, Datuk Dr Firdaus Abdullah bagaikan satu amanat berat kepada penyandang kerusi Ketua Pengarah Dewan Bahasa dan Pustaka (DBP), Abdul Adzis Abas yang dipersembahkan pada Malam Puisi Persatuan Penulis Nasional Malaysia (PENA) di Rumah PENA, Kuala Lumpur, baru-baru ini.

Penampilan sulung Abdul Adzis pada acara apresiasi puisi anjuran bersama Institut Terjemahan & Buku Malaysia (ITBM) dan DBP itu diraikan dengan sajian pulut kuning, sekali gus mengandungi seribu pengharapan semoga ada 'magis' baharu yang dibawanya dalam menerajui DBP.

Lebih 50 tahun yang lalu bersama degup jantung anak watan Dewan Bahasa dan Pustaka mengorak langkah memulakan satu perjalanan baharu dengan sikap positif dan harapan optimis

dengan semangat cinta membaca menggelorakan bara dan api perjuangan menjunjung obor cita-cita menatang martabat dan maruah bangsa, agama dan tanah air.

Pengarah Urusan ITBM, Mohd Khair Ngadiron tampil dengan menyampaikan puisi pendek bertajuk Sejarah yang padat mesej khususnya kepentingan mengingati peristiwa penting dan menjadikannya pedoman untuk masa depan yang lebih baik.

Apa yang tinggal bukan untuk ditinggal bukan untuk diulang silapnya bukan untuk dicerca musibahnya bukan untuk dinista yang tidak kita sukanya.

Aksi dan penghayatan Setiausaha Dua, Gabungan Persatuan Penulis Nasional Malaysia (GAPENA), Usman Gumanti Ibrahim ketika menyampaikan puisi bertajuk Seekor Kakak Tua dan Seorang Penyair menggamit perhatian khalayak yang cuba mencari makna tersirat di sebalik watak yang penuh rahsia.

Penyair ucap kalimat puisinya kakak tua menurut segera penyair naik suara kakak tua meninggi deria penyair menurunkan nada kakak tua ikut sama.

## Puisi kehilangan

Acara apresiasi puisi bulanan itu turut menampilkan persembahan puisi oleh Pelajar Fakulti Bahasa Moden dan Komunikasi (FBMK), Universiti Putra Malaysia (UPM), Syazana Abd Ghani yang menyampaikan sajak Perihal Kehilangan karya asal penyair muda, Hani Salwah Yaakup.

Begitulah kehilangan bukan dibatasi rasa sementara yang dilingkupi sekadar jiwa ada perancangan yang sememangnya tidak akan mudah difaham meski berkali-kali.


## Lancar empat naskhah baharu

Pada acara yang diselenggarakan oleh Pengerusi Tetap PENA, Dr Ibrahim Ghaffar itu, turut dilancarkan empat naskhah baharu, iaitu dua daripadanya karya Prof Madya Dr Abdul Rahman Napiah (Mana Sikana) terbitan DBP berjudul Daun-daun Keramat dan Drama dalam Penskripan,

## Pementasan dan Kritikan.

Dua karya lain yang diperkenalkan ialah kumpulan cerpen remaja, Senyum Ayah oleh Hasni Jamali dan Sfera Bersegi Lima (Fathul Khair Mohd Dahlan) terbitan bersama ITBM dan PENA.

Penulis lain yang turut beraksi termasuk mantan Ketua Unit Pengembangan Sastera dan Budaya BH, Sutung Umar RS; penulis veteran, Ahmad Sarju dan Timbalan Presiden Persatuan Linguistik Malaysia (PLM), Kamal Shukri Abdullah Sani.



Sutung Umar RS



Syazana Abd Ghani